

Mai 8, 2008  
Tapvainak Tusagatak

## Lyall sivullipaulluni AngajukKâgilikKauk Nunatsiavut

Jim Lyall Nain-imiuk annigjausimalikKuk sivullipângulluni AngajukKâginiattanga Nunatsiavut. Tamanna uKausiukKaujuk ullumi Nunatsiavut Annigusunnimi kamajillagingata Jack Shiwak.

Mr. Lyall annigjausimalautturuk 48 percent Dienstâgimi angajukKâsamik annigusujuKaniimmat, kingullianelaurtuk Natan Obed Iqalummiuk (Nainimiungulaurtuk) 25 percenttinut annigijaumalluni. Asingit annigigatsaulaurtuk, Johannes Lampe Nain amma Zippie Nochasak Happy Valley-Goose Bay, pingajolaurtuk ammalu sittamagijaullutik 17 amma 10 percent annigijaumallutik.

Annigigatsait AngajukKângugiamut ununninginnut annigijaumagialet ilonnaini annigusupviujuni, upvalu 50% ilagiallugu 1 annigusotik, malillugu Labrador Inuit PikKujatsuanga ammalu Nunatsiavut Annigusunnimi Maligatsak. Annigigatsaujuk ununninginnut annigjausimangipat, asianik annigusuttuKagiallaKagajalaukKuk akungani maggok ununnipânik annigijaumajonnik Kângigani 30-ni ulluni sivullimik annigusujuKakKâtillugu.

Mr. Lyall ununninginnut annigjausimangikalualduni, kajusiutjaulaurtuk annigjausimanninganik tainna Mr. Obed pigumasimalaugunnaimat kingullimi annigisuttisinnimik, uKajuk Mr. Shiwak.

“Nalunattujuk asingit sâlagijaumajut sivullimik annigusunnimi Kinijagunnamangâta angutiup annaulonnet atinganik kingullumi annigusunniujumi”, uKajuk Mr. Shiwak. “Tamanna nalunattillugu, ottugagiaKalaukKunga pitsatuniganik Annigusunnimi kamajillagiullunga uKagiamik Mr. Lyall annigjausimanninganik.”

Allasimauk 4(9) Nunatsiavut Annigusunnimi Maligatsanganai uKajuk:  
*AnnigusujuKanningani, apitsotet sakKijut piusiugialinnik malittaugiaKallutik kiujaugunnangittut tâtsumuna Maligatsakut upvalu PikKujatsuakut, apitsotet sittutitaugialet Nunatsiavut Annigusunnimi kamajillaginganut kajusiutigijanga pjagettilugu ammalu asiangutitaugunnagani...*

Atâgut Labrador Inuit PikKujatsuangata, AngajukKâsak annigijaumajuk killigiudjigutaugialik ammalu suliaKapvimentialluni Kângegani 30-ni ulluni annigusuttuKakKâtillugu. AngajukKâk suliaKapvimegialik sittamani jârini.

### **Kaujigiallavitsak:**

Jack Shiwak, Nunatsiavut Annigusunnimi kamajillagik  
709-947-3419  
709-947-3367 (tuavittukut0)